

Durante tratamiento di caso

Dada ta esun cu a bin cu plan pa comete robo na Esso Santa Cruz

ORANJESTAD(AAN) -- Manera DIARIO a publica caba, Diavierna e grupo relaciona cu e robo na Esso Santa Cruz mester a presenta dilanti mesa berde.

E trio A.G. mihor conoci como Ruru, A.C. mihor conoci como Tony y M.G. mihor conoci como Dada tabata e promernan di e grupo cu mester a presenta dilanti Juez mr. van der Griendt y Fiscal mr. van Wijland.

Durante interrogacion a bin resulta cu tabata Dada ta e persona cu e bin cu e plan y cu durante varios intento nan a fracaza den esaki.

Segun Ruru, Dada a acerce pa comete e robo hunto cu Tony, kende ta un empleado di Esso Santa Cruz. Tony tambe a manifesta cu el a worde acerca pa Dada.

Nan a planea pa comete e robo ariba un Dialuna pasobra ariba e dia ey tin mas placa den e caha.

Dia 16 di November 1987, Tony hunto cu doño di Esso Santa Cruz a bay den un auto pa deposita e placa na Aruba Bank.

Ora Tony a baha cu e caha di placa y un saco di placa, el a worde ataca pa Ruru, kende segun e plan a dal Tony un mokete basha abao y a core bay den direccion di Estrella pa asina subi den e auto cual tabata worde mancha pa Dada.

Na Macuarima Ruru a baha for di e auto pa asina sconde e placa. Ta trata aki di 36842,60 Florin.

Diarazon Dada a manda A.N.G. mihor conoci como Dolfi pa bay busca e placa

caminda Ruru a sconde y a bay sconde e botin na cas di D.G. mihor conoci como Padu.

Diavierna 20 November Dada a bay busca e placa caminda Padu a sconde y a duna E.D.G. pa sconde e suma y e muher M.G. kende tabata presente ora cu Dada y E.D.G. tabata sconde e placa a ricibi 250 Florin.

Durante un investigacion na cas di Dada autoridad a confisca mas o menos 10.700 Florin.

Despues di a confisca henter e botin a resulta cu ainda tin falta di mas o menos 5000 Florin. E detenidonan a manifesta na Juez cu nan no sa di e 5000 Florin.

Fiscal mr. van Wijland a manifesta cu dia 16 di November Santa Cruz a worde span-

ta pasobra un persona a worde atraca. Esaki segun Fiscal ta significa cu alarma grandi a worde bati na warda di Polis.

No por papia aki di un atraco ya cu ta trata aki di un plan traha pa tres persona. Fiscal ta considera e hecho aki mas bien un desfalco.

Den e caso aki por papia di complicidad di desfalco. Segun mr. van Wijland, Ruru tabata basta bobo di cay den e plan aki ya cu e ta un persona conoci pa autoridad. Pa Ruru Fiscal a exigi 1 año y 6 luna di prison kitando e tempo cu el a pasa den detencion preventivo.

Pa loko ta trata Dada, mr. van Wijland ta considere


como e mente principal di e robo y pa tal a exigi 1 año y 6 luna di prison kitando e tempo cu el a pasa den detencion preventivo.

Tony, mr. van Wijland ta haya cu el a abusa di e confianza cu e doño di trabao a pone den dje y pa tal a exigi 1 año di prison kitando e tempo cu el a pasa den detencion preventivo.

Pa loko ta trata e otro complicenan: A.N.G., D.G., E.D.G. y M.G., Fiscal a exigi 146 dia di prison di cual 120 dia ta condicional cu un tempo di prueba di 2 años.

Juez mr. van der Griendt a manifesta cu dia 6 di Mei e lo dicta sentencia.

Punto mas halto di prison nobo



ORANJESTAD(AAN)- Ayera e prison nobo cu lo bini na De Vuyst a yega su punto di mas halto. E proyecto aki mester entrega den e segundo siman di Februari 1989. Pero actualmente ta bezig pa expansion di e proyecto.

E expansion ta pa bin cu mas

cel, kapel, psychopaat y un departamento di TBR. Si en caso e segunda fase di e proyecto worde concedi, e tempo di contruccion lo bay dura algun luna mas.

E proyecto ta den man di e contratista Bohama Aruba nv. y pa trabaonan tecnico Bopel N.v. y pa trabaonan di

tereno y infrastructura Arubaanse Wegenbouw Mij. y Thiel Corporation. Architectonan di e proyecto ta Associated Architects Aruba n.v. y advisor Polytechnisch Ingenieursbureau n.v. y e coordinador di e proyecto ta den man di Domeinbeheer.

Esso Petrolera lo pidi permiso pa run dos stacion

ORANJESTAD (AAN) - DIARIO a ser informa cu si tur cos bay segun plan di Esso Petrolera dentro di poco luna mas nan lo bay mancha dos stacion di gasoline aki na Aruba.

Parce cu e Esso Petrolera a haci peticion na Gobierno pa haya permiso pa mancha dos stacion di gasoline.

Tur cos ta muestra cu e stacionnan lo bin pabao di brug y te hasta a ser menciona number di un stacion di gasoline cu lo ser kita for di e doño, debi cu e edificio y e pompnan ta di Esso

Petrolera. Actualmente tin 8 stacion di gasoline den funcion, di cual 6 ta di Esso Petrolera y dos tin doño cu ta Esso Santa Cruz y Ponton.

Parce cu Esso Petrolera a ofrece e huurdo di e edificio di Esso Service Center un recompensa pa e entrega e edificio back.

Di un bon fuente DIARIO a ser informa cu no ta exclui cu e stacionnan di gasoline lo bira algo nobo y unico aki na Aruba, esta estilo di Merca, manera "Seven Eleven" unda bo ta haya gasoline cumpra y cierto comestible pa cas.

Malcontento cerca trahadornan

Dialuna accion na oficina di Censo

ORANJESTAD(AAN) — E trahadornan di Censo no ta contento cu e forma cu cosnan ta bay na oficina y pesey segun informacion, Dialuna lo tene un accion pa demostra nan malcontento.

Publico cu ta acudi na oficina di Censo, cu ta un departamento hopi importante, hopi biaha mester warda basta rato promer cu por worde yuda.

Segun informacion cu DIARIO a ricibi, tin

problema na e oficina, ya cu aparentemente no tin suficiente hende pa traha na e departamento, cu a pidi pa nombra algun persona mas, pero no por mira e peticion aki honra ya cu tin un paro di personal di Gobierno.

Lo tin tambe varios empleado cu mester worde promovi pero te awe no a tende nada. Pesey lo ta e intencion pa Dialuna tene un accion pa subraya necesidadnan.